

Nunatsinni pisortat 1997-2001-mut aningaasaqarnerat

2001-imi pisortat ingerlataat suli ineriartorfiupput

*2000-imiit 2001-imut
pisortat aningaasartuutaat
4,3 pct.-imik qaffariarput.*

Nunatsinni pisortat ingerlatsinerat kiffartuussinerallu tamarmiusoq 2001-mi 7.069 mio. kr.-inik aningaasartuuteqarpoq imaluunniit 7,1 mia. kr. missaannik. Taamaalilluni pisortat ingerlataanni aningaasartuutit 2000-miilli 4,3 pct.-imik qaffariaateqarput, pisortat aningaasartuutaat katillutik 6.776 mio. kr.-iullutik. Aamma 2001-imi inuuniarnikkut toqqissisimanissamut atugarissaarnissamullu aningaasartuutit tupinnanngitsumik 1.703 mio. kr.-iupput aningaasartuutit tamakkiisut 24,1 pct.-eralugit, pisortat ingerlatsineranni kiffartuussinerannilu aningaasartuuteqarfiusuni annertunerpaallutik.

*Inuussutissarsiornermi
pisortat annertuumik
peqataapput*

Nunatsinni suliffeqarfinnut pisortat tapiissutigisartagaat tamarmiusut 2001-imi 640 mio. kr.-iupput, taakkulu pisortat aningaasartuutaasa tamarmiusut 9,1 pct.-eraat. Danmarkimut sanilliukkaani qallunaat suliffeqarfiutaannut 2000-imi tapiissutit 4,1 pct.-iummata, takuneqarsinnaavoq kalaallit inuussutissarsiorneranni pisortat annertuumik peqataasut.

*KNI Pisiffimmi iluanaarutit
isertitat qaffatsippaat*

2001-imi pisortat isertitaat katillugit 7.648 mio. kr.-iupput. Tamanna 2000-imut sanilliullugu 6,8 pct.-inik qaffariarfiuvoq, ukioq taanna isertitat katillutik 7.161 mio. kr.-iummata.

2001-imi isertitat annertusinerat pingaartumik naatsorsuutini inissitanit ”erniat iluanaarutillu”-mit pisuupput. Tassani isertitat 6,3 pct.-imik qaffariarput – 2000-imi 192 mio. kr.-iniit 2001-imi 475 mio. kr.-inut. Ernianit iluanaarutinillu isertitat annertuseriaataasa ilaat KNI Pisiffimmi piginneqataassutinik Namminersornerullutik Oqartussat tunisaqarnerannit pisuupput.

*Koruunip isertitap ataatsip
aappaa inulaarlugu
nunanit allanit
nuunneqartarpoq*

”Nuussisarnerit ingerlaavartut allat”-nit isertitat 3.769 mio. kr.-iusut nunatsinnut isertitaasartut tupinnanngitsumik annersaraat. 2000-imi koruunip isertitap ataatsip aappaa sinnerlugu nunanit allanit nuussaagaluartoq, taamaattoq 2001-imi nuutat 49,3 pct.-inut appariarsimapput. EU’p ingerlatsisoqarfiinit 2001-imi 321 mio. kr. kalaallit imartaani aalisarsinnaatitaanermut akuersissutitut akiliutitut nuunneqarput. 2001-imi qallunaat naalagaaffiannit nuuttat 2.897 mio. kr.-iupput. Taakkunanga naalagaaffimmit ataatsikkut tapiissutit 2.793 mio. kr.-iupput.

Kommunit aningaasartuutaat 2001-imi 8,7 pct.-imik qaffariarput

Kommunit ingerlatsinerat 2001-imi 3.050 mio. kr.-inik aningaasartuuteqarfiuvoq imaluunniit 3,1 mia. kr.-ngajannik. Taamaalilluni kommunit aningaasartuutaat 2000-imiilli 8,7 pct.-inik qaffariarput, taamanikkut aningaasartuutit 2.806 mio. kr.-iummata.

Taamatuttaaq inuuniarnikkut toqqissisimanissamut atugarissaarnissamullu kommunini aningaasartuutit 1.303 mio. kr.-iusut 2001-imi tamakkiisunit 42,7 pct.-iusut naatsorsuutini annertunerpaapput. Naatsorsuutini inissitaq pingaaruteqartoq alla tassaavoq atuartitaaneq, kommunit aningaasartuutaanni 2001-imi 20,0 pct.-iusoq 611 mio. kr.-inik annertussuseqarlutik. Taakkunanga 92,3 pct. meeqqat atuarfiannut atorneqarput.

*Akissarsianut
aningaasartuutit 2000-
imiit 2001-imut 10,0 pct.-
imik qaffariarput*

Aningaasartuutit qaffariaataasa amerlanersaat aningaasaliissutinut nutaanut aalaakkaasunut tunngasuupput. Tassani kommunit 2001-imi 227 mio. kr. atorsimavaat qulleriinneri malillugit 1997-imi 2000-imilu aningaasartuutaasunit 78,7 pct.-imik aamma 50,3 pct.-inik qaffasinnerullutik. Kisitsisinut ullumikkut atuuttunut nallersuutissagaani akissarsianut aningaasartuutit qaffakkiartuinnartut oqimaannerpaapput. Akissarsianut aningaasartuutit 2000-imiit 2001-imut 1.197 mio. kr.-iniit 1.317 mio. kr.-inut qaffapput. Tamanna 10,0 pct.-imik qaffariarneruvoq, kommunini aningaasartuuteqaleriartormik kinguneqarsimalluni.

Namminersornerullutik Oqartussat aningaasartuutaat sualunngitsumik qaffakkiartorput

Namminersornerullutik Oqartussat 2001-imi 4.942 mio. kr. imaluunniit 4,9 mia. kr. aningaasartuutigaat, 2000-imut sanilliullugu 1,2 pct.-imik qaffariarfiulluni, taamanikkut aningaasartuutit 4.882 mio. kr.-iummata.

Namminersornerullutik Oqartussat 2001-imi aningaasaqarnerisa takutippaa ingerlatsineq aningaasaatillu 501 mio. kr.-inik sinneqartoofiusut. Nunat tamalaat maleruagassiaat naapertorlugit nammineq ingerlatsivigivinnigisani namminersornerusut aningaasaliinikkut tapiissutaat naatsorsoqqissaakkani ilanngunneqanngillat. Taamaattumik ingerlatsinermi aningaasaatinillu sinneqartoofutit landskarsip naatsorsuutaani IST-saldomut paarlaatinneqassanngillat, tassani 2001-imi 5 mio. kr.-inik sinneqartoortoqarmat.

Namminersornerullutik Oqartussat peqqinnissaqarfiup ingerlanneranut kisimiillutik akisussaapput. 2001-imi aningaasartuutit 844 mio. kr.-iusut assigaat namminersornerusut aningaasartuutaasa tamarmiusut 17,1 pct.-ii.

Inuussutissarsiornikkut aningaasaqarnermut tunngatillugu suliffeqarfiit niuernermik, kiffartuussinermik takornariaqarnermillu suliallit aammalu inuussutissarsiutit pingaarnerit aalisarneq, piniarneq nunalerinerlu pineqartillugit Namminersornerullutik Oqartussat peqataalluinnarnerat pingaaruteqarpoq. Inuussutissarsiornikkut aningaasaqarnermut tunngatillugu 2001-imi aningaasartuutit 764 mio. kr.-iupput aningaasartuutinut tamarmiusunut 15,5 pct.-iullutik.

Isertitanit pisuussutinillu ingerlaavartumik akileraaruteqartitsinikkut Namminersornerullutik Oqartussat 2001-imi isertitaat 985 mio. kr.-iupput isertitanut tamarmiusunut 18,1 pct.-iullutik. Tunisassiornermut nioqqutissanillu avataanit eqqussukkanut akileraaruteqartitsinikkut 2001-imi isertitat 672 mio. kr.-iupput imaluunniit isertitanit tamarmiusunit 12,3 pct.-iullutik. 3.219 mio. kr.-inik 59,1 pct.-inik isertitaqarnikkut nunanit allanit qallunaallu naalagaaffiannit nuutat Namminersornerullutik Oqartussat isertitaqarfiisa annersaraat. Isertitat ilarpassui nunatsinni kommuninut ingerlateqqinneqartarput. Taamaalilluni Namminersornerullutik Oqartussat 2001-imi nunatsinni kommuninut ingerlatsinermut aningaasaliissutinullu tapiissutit 1.492 mio. kr. nuuppaat.

Naalagaaffiup aningaasartuutai 2001-imi 4,6 pct.-inik qaffapput

Naalagaaffiup ingerlatai Nunatsinni nunattalu eqqaani 2001-imi 569 mio. kr.-inik aningaasartuuteqarfiupput. Taamaalilluni naalagaaffiup ingerlataani aningaasartuutit 2000-imiilli 4,6 pct.-imik qaffassimapput, taamanikkut aningaasartuutit katillutik 544 mio. kr.-iullutik.

Naalagaaffiup ingerlataasa nunatsinni pingaartumik akisussaaffigaat illersorneq kiisalu innuttaasut eqqissisimanissaat isumannaatsuunissaallu, tassani pineqarlutik politiit, eqqartuussiveqarneq kiisalu parnaarussiviit isertitsisarfiillu. 2001-imi illersornermut aamma eqqissisimanissamut isumannaatsuunissamullu aningaasartuutit 417 mio. kr.-iupput, naalagaaffiup Nunatsinni aningaasartuutaasa tamarmiusut 73,3 pct.-ii.

*Aalisarnermik
nakkutilliineq
198 mio. kr.-inut*

Nunatsinni illersornissamik isumagisaqarnermi pineqarput Grønlands Kommando, Slædepatruljen Sirius kiisalu aalisarnermik nakkutilliineq, sakkutuunit imarsiorunit sakkutuunillu timmisartortartunit isumagineqartoq. Illersornissamut aningaasartuutit 2001-imi katillugit 261 mio. kr.-iupput. Isumagisaq ataaseq anginerpaaq; aalisarnermik nakkutilliineq, taakkunannga 198 mio. kr.-inik aningaasartuutaavoq naalagaaffiup ingerlataasa tamarmiusut aningaasartuutigineranni 34,8 pct.-iulluni. Inatsisit, eqqissisimanissap isumannaatsuunissallu malitsinniarnerinut qallunaat naalagaaffiata 2001-imi 156 mio. kr.-it atorsimavai. Taakkunannga politiit eqqartuussiveqarnerlu tulleriinneri malillugit 93 mio. kr.-inik aamma 37 mio. kr.-inik aningaasartuuteqarfiupput.

*...imaluunniit
pappiaranngorlugit*

Aammattaaq pappiaranngorlugu naqitertitaq Kalaallit Nunaanni Naatsorsueqqissaartarfimmut piniarneqarsinnaavoq. Telefonikkut 34 50 00-kkut imaluunniit e-mailikkut ugguuna: stat@gh.gl nassiunnerani aningaasartuutit akilerlugit.

Paasissutissat uunga saaffiginninnikkut pissarsiarineqarsinnaapput: tusagassiortoq Thorkild Knudsen tlf. 34 55 85 (toqqaannartumik).

Inussiarnersumik inuulluaritsi

Thorkild Knudsen

Siunissami naatsorsoqqissaakkat nutaat, Kalaallit Nunaanni Naatsorsueqqissaartarfiup nittarsaaviatigut tamanut tusagassiarineqartartut pillugit paasisaqartarusukkuut elektronik atorlugu nutaarsiassanut allagaatitsinnut ilanngussinnaavutit.

Iserfigiuk www.statgreen.gl. Menuimi saamimmut allermi toqqassavat ”abonner på nyhedsbrev”. Taava siunissami naatsorsoqqissaakkanik nutaanik tamanut saqqummiussigaangatta pinerit tamaasa e-mailikkut pisalissavatit.